



**Uorden de sepultura
e santeri della vischnaunca**

R U S C H E I N

I. Determinaziuns generalas

Art. 1 Intent

Tenor il regulativ cantunal dils 14 de mars 1977 partenent ils fatgs de sepultura ein ils fatgs de santeri e sepultura caussa della vischnaunca politica. Il santeri survecha al davos ruaus terrester dils defuncts. Perquei duein tuts vischins salvar el en duida honor e tener el en bien uorden.

Art. 2 Cumpetenzza

La suprastonza communal survigilescha il santeri, procura per bien uorden e decida davart l'execuziun ed interpretaziun de questa lescha, sco era davart tuttas damondas che pertuccan igl uorden santeri.

Art. 3 Survigilonza

La suprastonza communal ei responsabla per la survigilonza dil santeri e l'execuziun dellas lavurs en santeri.

Ella procura per bien uorden en santeri, retscheiva las annunzias de sepultura e pren las disposiziuns necessarias per satrar e menar il register dellas fossas.

La suprastonza communal elegia per il cuoz de sia perioda d'uffeci in da ses commembers sco cau dil santeri.

Plinavon fixescha la suprastonza communal il cavafossas.

II. Obligaziuns dils organs

Art. 4 Obligaziuns

Alla vischnaunca ei surdada la procura de:

- a) erecziuns, ingrondaziun e reparaturas,
- b) indrez de cavar fossa e de satrar,
- c) cavar fossa e cuvierer

Art. 5 Cau dil santeri

Il cau dil santeri ha quitau dils fatgs de sepultura e la survigilonza sur dil santeri. El ha l'incumbensa de:

1. *fixar la satrada en cunvegnientscha cugl uffeci parochial,*
2. *dar las incaricas necessarias per metter en vischi, de transportar, cumpignar e satrar las baras, schilunsch che quellas ein per part buca vegnidas dadas dils parents.*

Art. 6 Cavafossas

Ils cavafossas han il suandont pensum:

1. arver la fossa tenor las mesiras prescrettas tochen sil pli tard in'ura avon la sepultura,
2. metter pli afuns restonzas d'anteriuras sutterradas,
3. curclar la fossa e fermar la crusch-lenn,
4. haver quitau dils uaffens dil cavafossa.

III. Uorden de sepultura

Art. 7 *Obligaziun d'annunzia*

Tuts cass de mortori sigl intschess della vischnaunca politica de Ruschein, anfladas de baras e parts de morts ein d'annunziar ladinamein al miedi cumpetent per l'urentada della bara e per schar dar igl attest de mort. Silsunter ei l'annunzia de far pei a pei agl uffeci civil.

Tgi ch'ei staus perdetga della mort d'ina persuna nunenconuschenta, che ha anflau ina bara ni tgi che ha enconuschientscha d'in cass de mort ord motivs extraordinaris, ei obligaus d'annunziar quei immediatamein allas autoritads cumpetentas.

Art. 8 *Uffeci civil*

Per il cass ch'ina urentada d'ina bara ei buca vegnida fatga, ordinescha igl uffeci dil stadi civil quei.

En cass de cremaziun procura el per la lubientscha de cremaziun tier il miedi distric-tual.

Igl uffeci dil stadi civil annunzia il mortori al cau dil santeri.

Art. 9 *Dretg de sepultura*

Il dretg de sepultura en santeri communal han:

- a) tuts burgheis e domiciliai en vischnaunca,
- b) ulteriuras personas, mortas sin territori della vischnaunca ni talas anfladas leu, aschinavon che quei vegn giavischau,
- c) cun lubientscha della suprastonza communal burgheis de Ruschein che habiteschan ordeifer ni defuncts che havevan relaziuns specialas cun la vischnaunca ni cun vischins de Ruschein.

Art. 10 *Taxas per satrar*

Per cuvierer las expensas de cavar fossa e cuvierer incassescha la vischnaunca ina contribuziun pauschala che cuarcla las expensas. Tala vegn fixada dalla suprastonza communal. En cass de direzia decida la suprastonza. Personas ch'ein s'annunziadas ed habiteschan en vischnaunca ein deliberadas de prestar quella contribuziun pauschala.

Burgheis de Ruschein ordeifer vischnaunca pagan sper las expensas de cavar fossa e cuvierer ina contribuziun de fr. 300.— per bara ni frs. 200.— per urna.

Persunas che habiteschan ordeifer vischnaunca pagan sper las expensas de cavar fossa e cuvierer ina contribuziun de frs. 800.— per bara ni frs. 700.— per urna.
(rev. 29.11.1990)

Art. 11 *Deponer baras*

Per deponer las baras stat la caplutta de Nossadunna a disposiziun. La suprastonza communal collaborescha cun la pleiv davart dil diever della caplutta.

Art. 12 *Temps de sepultura*

Las sepulturas han liug per regla suentermiezdi.

Art. 13 *Tuchiez*

Per annunziar la mort vegn tuccau:

- a) per in um: il zenn 1 (grond)
 - b) per ina femna: il zenn 2
 - c) per barets: il zenn 4 (pign)
- cun interrupziun 3 gadas.

Il di de bara vegn ei tuccau in'ura avon sepultura ils cuors sco sequent:
3 x 6 minutas cun 4 minutas pausa.

IV. Uorden de santeri**Art. 14 *Possess***

Il santeri sper la baselgia de s. Gieri ei en proprietad della pleiv de Ruschein. Alla vischnaunca politica vegn concediu il dretg permanent de siu diever. Il santeri surve-scha alla sepultura de tuts defuncts che han il dretg leutier tenor art. 9.

Visitaders dil santeri duein secuntener ruasseivlamein e conform alla dignitad dil liug. Animals astgan buca vegnir menai en santeri.

Art. 15 *Partiziun*

Las sutterradas vegnan fatgas tenor plan en retscha successiva. Las fossas ein re-partidas en:

- Partiziun A: Retschas-fossa per carschi ed affons sur 7 onns
- Partiziun B: Retschas-fossa per affons sut 7 onns
- Partiziun C: Retschas-fossa per spirituals

Fossas dublas e fossas de famiglia vegnan buca concedidas.

Art. 16 *Grondezia dellas fossas*

Per arver las fossas muntan las grondezias:

- Partiziun A e C: Liung 210 cm, lad 80 cm, profund 150 cm
- Partiziun B: Liung 120 cm, lad 50 cm, profund 120 cm

Per urnas munta la profunditad ad 80 cm.

La distanza denter las fossas mesira 30 cm, la ladezia dallas vias 60 cm.

Art. 17 *Temps de ruaus*

Il temps de ruaus per tuttas fossas ei silmeins 20 onns (rev. 12.4.2002)

Art. 18 *Exhumaziun*

L'exhumaziun d'ina bara avon la spirada dil temps de ruaus ei scumandada. Il departement de sanitad sa lubir in'excepziun sin ina damonda motivada della parentella ni della vischnaunca, denton sil pli baul 10 onns suenter la sepultura. Per l'exhumaziun ord motivs giudizials vala igl art 96 StPO (della procedura penala). Vegn

l'exhumaziun buca pretendida ufficialmein, ha il committent de surprendre tut ils cuosts.

Art. 19 *Allontanaziun*

Suenter la spirada dil temps de ruaus sa il cau dil santeri pretender in'allontanaziun dils craps-fossa. Entras publicaziun ufficiala vegn il termin d'allontanaziun limitaus sin dus meins. Vegnan las fossas buca deliberadas enteifer quei termin, procura il cau dil santeri ch'ellas vegnan schligiadas si ed ils craps-fossa crodan, senza bonificaziun, en possess della vischnaunca. Tenor pusseivladad vegn allontanau mintgamai cruschs e ramas d'in'entira retscha.

Art. 20 *Crusch-fossa e mesiras*

Scadina fossa duei vegnir signada cun ina crusch ni cun in monument, denton en omisdus cass mo de material natural.

Las mesiras muntan:

- Per partiziun A e C: Altezia della crusch / dil monument naven dalla rama 120 – 140 cm, ladezia della crusch resp. monument 50 – 70 cm
- Per partiziun B: Altezia della crusch / dil monument naven dalla rama 70 – 90 cm, ladezia della crusch resp. monument 30 – 40 cm

Il crap per la crusch astga buca survargar la rama per pli che 10 cm.

Art. 21 *Rama fossa*

La dimensiun della rama ei fixada per la:

- partiziun A e C: 160/60 cm (mesira ordado)
- partiziun B: 95/45 cm

Art. 22 *Temps de tschentada*

La crusch resp. monument sco era la rama-fossa duein vegnir tschentadas pér in onn suenter la satrada. Il terren astga ni esser bletschs ni schelaus. Entochen il temps della tschentada duei la crusch-lenn purtar il num.

Art. 23 *Manteniment*

Las fossas duein vegnir mantenidas en uorden. La parentella ei responsabla per il manteniment della fossa. Ei il manteniment munclus, fixescha il cau dil santeri in termin enteifer il qual la fossa sto vegnir messa en uorden. Ei quel spiraus senza ch'ei seigi vegniu interpretu enzatgei, lai il cau santeri metter en uorden la fossa sin donn e cuost della parentella.

Art. 24 *Responsablidad*

La parentella ei responsabla per tuts donns che vegnan caschunai tras manteniment insufficient.

La vischnaunca ei buca responsabla per donns che vegnan caschunai encunter tut dretg de tiarzas personas ni de forzas superiuras.

Art. 25 *Register dellas fossas*

La suprastanza communal ei responsabla per il register dellas fossas che cuntegn il numer dellas fossas, il num ed il prenum dil defunct sco era il datum della sepultura.

V. Recuors**Art. 26 *Protestas***

Protestas encunter decisiuns dil cau dil santeri ein d'inoltrar enteifer 20 dis alla suprastanza communal. Recuors viers decisiuns de quella ein d'inoltrar enteifer 20 dis alla dertgira administrativa dil cantun Grischun.

Art. 27 *Determinaziuns penalas*

Cuntravenziuns a quei uorden ed agl uorden cantunal vegnan punidas cun ina multa de frs. 10.— tochen frs. 200.—.

Vegnan cruschs eregidas encunter las prescripziuns de questa lescha ni della lubientscha dada, ha la suprastanza communal il dretg d'ordinar ch'ils indrezs vegnien midai ni remplazai.

Art. 28 *Abrogaziun de determinaziuns cuntradictorias*

Cun l'entrada en vigur de quest uorden vegnan tuts conclus de vischnaunca ch'ei cuntradictoris a quei uorden abrogai.

Art. 29 *Messa en vigur*

Quei uorden passa en vigur cun l'approbaziun della radunonza communal e dil departament cantunal de sanitad.

Approbau dalla radunonza communal dils 8.8.1980

Il president communal:

Vinzens Ewald

Igl actuar:

Coray Ludwig

Approbau dil departament de sanitad cantunal

Cuera, 17 d'october 1980

Il cusseglier:

Otto Largiadèr